

“Ami ta un Trupial....”

MI nomber ta Manuel Da Silva, conoci como Manuelito Di Manuelito Sports Bar, conoci como Comentarista di e deporte di Drag-race, como tambe presentador di Deporte den Tele-noticia na TeleAruba.

Pero no semper mi tabata asina. Den mi hubentud mi tabata “timido”, mi tata a dicidi di haci mi misdienaar na misa di playa y na kapel di Hospital San-Pedro, y ora mi tata a tende “De Trupialen” ta canta coro den misa di playa e la acerca Frère Alexsius y e siguiente diamars mi a bay practica canto den club di “De Trupialen”.

Esaki tabata na aña 1965 pa 1966, y a tuma mi 6 luna di training den e grupo aspirant-junioren pa mi por a bira un “Junioren”.

Despues di hopi tempo y prac-

tica porfin na aña 1966 mi a wordo instala oficialmente como un Trupial den Cas di Cultura.

Y di eynan e parti dushi a cuminsa: canta den coro na misa, training pa comedia, y ora e comedia tabata cla, nos tabata presenta e comedia den tur barrio di Aruba.

Locual tabata hopi agradabel tabata di por a pasa bishita scolnan y siña nan con pa canta den coro na misa, y corda cu e tempo ey mucha homber nan tabata bay school apart di mucha muhe nan, pero “De Trupialen” tabata permiti pa drenta meisjes school pa duna les di canto, ta artista grandi nos tabata meymey di tur e mucha muhe nan.

Naturalmente e trabou aki tabatin su pago, esun cu haci su

best henter luna, diasabra frèrè Alexsius tabata hiba nos lama den su bus di palo cu su 2 rubber boot nan, y e mes ta sinta bou su paraplu y sinta wak nos gosa di un dushi dia na lama, pero si e ripara cu tin pleitamento pa un di e rubber bootnan e tabata bolter e rubber boot boca abou y pleito a caba.

Den grupo di “junioren” frèrè nan tabata dicidi tur cos pero pa tempo mi a bira 14 aña nan a pasa mi pa aspirant senioren, aki bo ta siña organisa y domina diferente disciplina entre otro prepara y entrena comedia y musica, cu ta encera participa den reunionnan caminda cu bo ta duna bo opinion. Den otro palabra siña organisa actividadnan y asina poco poco bira un lider.

Tur esaki naturalmente bou di



supervision di frèrè nan.

Den “De Trupialen” mi a cera conoci cu hopi amigo y amigana cu te e dia di awe nos a keda bon amigo.

Danki na “De Trupialen” mi a siña expresa mi mes via canto, comedia pero tambe den

reunionnan mi a siña organisa actividadnan.

Danki na mi mayornan y na “De Trupialen” mi a haya e disciplina pa ta ken mi ta awe.

Pesey awe mi por bisa cu orguyo, AMI TA UN TRUPIAL!!!!!!